



Sabtu, 23 Nopember 2024

Ogen: Kejadin 31:1-9



Ingan Perbulangen Nuri-Nuri



Pillow talk' sada istilah percakapan intim si umumna ilakoken perbulangen ras ndehara. Ertina 'percakapan bantal' i ja sope tunduh, ercakup-cakap amin santai tapi terbuka ras mendalam. Melala si jadi i bas kegeluhen ntah pe penting adi icakapken alu santai banci terdungi alu mehuli. La saja persoalen tapi ide-ide ras rencana ku pudi wari enda subuk i bas jabu, pendahin, anak-anak ras sidebanna. Enda me si enggo langka i bas paksa genduari enda, perbulangen ras ndehara lanai melala waktuna ercakup. Amin bengket ku kamar sope tunduh pe, la bo ras ercakup, tapi ras teman 'dunia mayana' cerita, sibalas-balasen sms na tapi ras ndehara ntah perbulangen la erkuan sope tunduh e pe. Kedungenna lanai man banta perbulangen nuri-nuri ntah pe sebalikna. Renungenta enda nuriken kerna Jakub i bas perukuren ras persoalen siniakapna arus iarihkenna ras ndeharana. Enggo iidahna lit si berubah i bas mamana Laban, bage pe silih-silihna anak Laban. E maka idilona ndeharana, iturikenna kai si jadi rikut ras kai sura-surana ku pudi wari enda. Sabap kai pe keputusan Jakub mbelin ngaruhna ku bas anak-anak bage pe ndeharana. Apaika lit hubungenna ras orangtuana jine tentuna mberat erbahan keputusan kai pe. E maka iturikenna kai si jadi gelah dikune turangna e pe nuriken si la payo man bana kerna erta-erta Jakub banci lanai terpengaruh ndeharana. Alu bage jabuna tetap nteguh dengen tek ia nandangi perbulangenna. Bage me renungen enda mpersingeti kita gelah tetap nikapken waktu ercakup-cakap ras perbulangen. Di kune ia nuri-nuri ula minter kita jungut-jungut ntah merawa, amin gia la bagi ukurta. La saja nikapken waktu tapi nikapken pusuhta pe guna ndengkehken turi-turin perbulangenta.